



**Les Fleurs Des Vies Des Saints Et Des Festes De Toute
L'Annee, Suivant L'Usage Du Calendrier Romain Reforme**

Augmentees des Saints & Bien-heureux Peres Iesuites, de Saint Charles
Borromeo, & de Sainte Françoise ; Avec le Martyrologe Romain, pour
tous les iours de l'Annee ...

Ribadeneyra, Pedro de

Paris, 1631

XXIV La vie de Saint Timothée Euesque & Martyr.

[urn:nbn:de:hbz:466:1-75749](https://nbn-resolving.org/urn:nbn:de:hbz:466:1-75749)

23. IAN- VIER
 jours & trois nuicts prosternée deuant les Reliques du saint, le suppliant puis qu'il estoit viuant en Dieu, qu'il luy manifestast ce qu'il auoit fait de son papier. Le saint luy apparut la troisieme nuict & luy rendit son papier seellé & cacheté tout ainsi qu'il l'auoit receu d'elle. La femme le print, & recogneut que c'estoit celuy-là mesme qu'elle auoit escrit de sa main, & baillé à l'Euesque: en l'ourant elle trouua son escriture effacée, & ces paroles mises au lieu: *Ton grand peché a esté rayé par mon seruiteur Iean.*

La vie de ce glorieux Prelat a esté escrite par Leonce Euesque de Naples en Cypre, de laquelle est fait mention au deuxiesme Synode de Nysse, dans S. Iean Damascene, & le Bibliothecaire Anastase l'a traduite de Grec en Latin par le commandement du Pape Nicolas, ainsi que Sigebert afferme. On dit que son corps fut transporté à Venise. Il est fait mention de S. Iean l'Aumosnier au Martyrologe Romain le 23. de Ianuier, & les Grecs solemnisent la feste ce mesme iour, encore que le Cardinal Baronius dit que c'est le iour auquel il fut sacré Euesque: & qu'il deceda le 3. de Feurier. Il parle de luy en ses Annotat. au 8. Tome de ses Annales.

A Rome sainte Emerentiane vierge estant encore Catechumene, & n'ayant receu le saint Baptesme, s'en allant neant moins prier sur le tombeau de sainte Agnes, qui auoit esté sa seur de lait, fut lapidée par les Gentils. A Philippes ville de Macedoine S. Parmenas qui fut vn des sept premiers diacres, s'employant de tout son pouuoir à l'office de Predicateur, qu'on luy auoit enuoyé, fut martyrisé sous l'Empereur Traian. A Cesarée ville de Barbarie S. Seuerian & sa femme Aquila furent bruslez. A Antioche ville d'Egypte S. Asclas martyr apres auoir souffert diuers tourmens, fut precipité dans vne riuiere, où il rendit son ame à Dieu. A Ancyre ville de Galace S. Clement Euesque, ayant esté plus de dix fois tres-cruellement tormenté, accomploit en fin son martyre sous l'Empereur Diocletian. Au mesme lieu deceda saint Agathangel, qui endura à mesme iour, du temps du President Lucie. En Alexandrie saint Iean l'Aumosnier, Euesque tres-renommé pour sa charité & misericorde enuers les pauures. A Toledo ville d'Espagne S. Ildefonce Archeuesque, lequel tant pour l'integrité de sa vie, que pour auoir entrepris la desceinte de la virginité de nostre Dame, contre les heretiques qui en debatoient, receut en don de la part de la mesme Vierge, vne belle chasuble blanche, & depuis ayant veescu fort saintement, fut appellé au Ciel. En Italie deceda saint Martin Moyne, auquel saint Gregoire fait mention en ses Dialogues.

LA VIE DE SAINT TIMOTHEE,
 Euesque & Martyr.



24. IAN- VIER
 La vie du bien-heureux saint Timothee disciple de l'Apostre saint Paul Euesque d'Ephese, & martyr de Iesus-Christ, est tirée du Breuiare Romain, de saint Isidore, de Metaphraste, & est telle. Saint Timothee nasquit en Lycaonie, & fut nourry à Listres: sa mere s'appelloit Eunice, & son ayeule Louyse, desquelles saint Paul fait mention, come de femmes fort deuotes & vertueuses. Elles estoient Iuives, & son pere estoit gentil. Saint Paul venant avec saint Barnabé à Listres (comme l'on void es Actes des Apostres) & ayant guary vn boiteux, plusieurs personnes furent es-

24. IAN- VIER
 meues par ce miracle, & entre ceux qui se conuertirent lors à la Foy de Iesus-Christ, l'vn fut Timothee: ses parens logerent les Apostres chez eux, & leur donnerent leur fils, enfant d'vn bel esprit, bien né, & d'vne douce condition, afin qu'ils l'enseignassent & dressassent de leur main: & l'Apostre saint Paul le prit depuis en sa compagnie, & le tint comme son fils, & tres-cher disciple, luy enseignant ceste doctrine qu'il auoit apprise au troisieme Ciel, & le menant en ses peregrinations, comme son tres-cher compagnon. Et Timothee l'accompagnoit ioyeusement, supportant les trauaux & perils qu'ils rencontraient de iour en iour, avec vn courage magnanime & esprit de nostre Seigneur, sans faire cas de sa foiblesse & ieunesse. Ainsi saint Paul en ses Epistres l'appelle tantost frere, tantost tres-cher fils, & fidele en nostre Seigneur, d'autrefois Ministre de Dieu, & son coadiuteur en l'Euangile: & en d'aucunes de ses Epistres, il met en teste Paul & Timothee seruiteurs de Iesus-Christ; comme si ses Epistres estoient d'eux, & nō de saint Paul seul. Bref, il dit de Timothee qu'il faisoit le mesme ceuvre de Dieu, que luy, & qu'il n'auoit personne avec lequel il fust tant vny, & d'vn mesme ceuvre: qui est vn grand argument de la rare vertu, & hauts merites de ce Saint, puis que ce vaisseau esleu de Dieu & organe du saint Esprit, l'ayma, le loia, & l'estima de telle sorte. Mais encore que Timothee fust tel que saint Paul le despeint, cela ne le rendoit pas nōchalant ny esuente: au contraire, il estoit plus humble & plus contrit, il affligeoit sa chair pour rendre son esprit plus vigoureux & robuste, & encore qu'il fust trauaillé d'vne foiblesse d'estomach, & autres continuelles maladies, il beuoit de l'eau avec vne telle rigueur, qu'il fut besoin que l'Apostre mesme luy commandast qu'il beust vn peu de vin, parce qu'il estoit expedient pour sa santé. Il fut non seulement le disciple bié-aimé de S. Paul, celuy qui l'accompagna en plusieurs voyages, & le seruit, visitant en son nom les Chrestiens, les consolant & encourageant par son exēple & predication: mais aussi il fut disciple & tres-cher fils du mignon de N. S. saint Iean l'Euangeliste: lequel auparauant que l'Empereur Domitian l'eust banny en l'Isle de Pathmos, viuoit en Ephese, & là gouernoit toutes les Eglises de l'Asie; & estant banny, il laissa en sa place Timothee, qui fut Euesque d'Ephese, d'vne tres-grande sainteté, edification & vtilité de toute l'Eglise de N. S. encore qu'il ne demoura gueres d'années dans ce siegelà, d'autant que les Gentils celebrans vne feste en laquelle ils couroient masquez, vsoient d'vne cruauté barbare contre les hommes & les femmes qu'ils rencontraient par les ruës, leur donnans des coups de certaines marores ou massues qu'ils portioient en leurs mains, dont plusieurs en mouroient, péfans par ce brutal sacrifice d'eust appaiser leurs Dieux. Le saint Euesque les en reprit, & tascha de les diuertir de ceste folie prophane & sacrilege: dont ils s'aigrirent si fort contre luy, qu'ils luy ietterent à la teste tout ce qui leur vint à la main, & le frappans cruellement & furieu-

24.
I A N -
V I E R

fement, ils le trainèrent si long temps, qu'ils le laissèrent pour mort. Les Chrestiens accourrēt, qui le trouuerent aux abois, cōme de fait il rendit tost apres l'esprit à Dieu, & son corps fut enseuely en vn lieu nommé Pion, avec vn grand regret & deuotion des Chrestiens: iusqu'à ce que l'Empereur Constance fils du grand Constantin, trāporta ses sainctes Reliques en vne Eglise qu'il fit bastir en l'honneur des Apostres: & l'Empereur Iustinian l'accrēt, & la rendit plus somptueuse & magnifique: saint Ignace en l'Epistre qu'il escript à ceux d'Ephese, leur dit: *Vous estes conseruez vous autres avec Paul, avec Jean, & avec le tres-fidelle Timothée.* Et en vne autre Epistre qu'il escript aux Philadelphiens, il dit que Timothée se deuoit conter entre les tres-sainctes hommes qui ayent passé leur vie en pureté & virginité. Il mourut le 24. Ianuier l'an de nostre Seigneur cent neuf, sous l'Empire de Trajan. L'Eglise celebre la feste le mesme iour.

La Feste de saint Timothee disciple de saint Paul Apostle, & par luy sacré Euesque d'Ephese, lequel apres auoir beaucoup enduré pour la Foy, comme il reprenoit vn iour ceux qui sacrisoient à Diane, fut accablé de pierres, & peu de temps apres mourut. En la ville d'Antioche saint Babylas Euesque ayant souuent esfois glorifié Dieu par ses passions & tourmens, durant la persecution de l'Empereur Dece, finalement il mourut en prison les fers aux pieds, avec lesquels il voulut estre enseuely. On dit aussi que trois enfans, Vrbain, Prilidian & Epologie, qu'il auoit instruits en la Foy, endurent avec luy. A Neocesaree decederent les Sainctes Martyrs, Mardonie, Mussonie, Eugene & Metelle, qui furent bruslez, & leurs cendres iettees en la riuiere. A Enigni au Duché de Spolette saint Felician sacré Euesque de ladite ville par Victor Pape, ou ayant beaucoup trauaillé fut en extreme vieillesse martyrizé souz l'Empereur Dece. Item, les sainctes Martyrs Thyse & Proiet. A Boulogne en Italie saint Zames premier Euesque dudit lieu, lequel ayant esté sacré par saint Denys Pape, y amplifia grandement la Foy Chrestienne. Au mesme lieu mourut saint Suran Abbé, lequel fut renommé pour sa sainteté du temps des Lombards.

DE LA CONVERSION DE
l'Apostre saint Paul.

25.
I A N -
V I E R

Le bien-heureux Pape Gregoire dit en ses Dialogues, que c'est vn plus grand miracle, que Dieu donne la vie à vne ame morte par le peché, que s'il ressuscitoit vn corps mort du sepulchre: car en l'vn il ressuscite la chair, qui doit mourir vne autre fois: & en l'autre, l'ame qui doit viure à iamais. Et il afferme avec beaucoup de raison, que ce fut vn plus grand miracle de conuertir saint Paul, que de ressuscite le Lazare mort il y auoit quatre iours, & qui estoit desia pourry en la sepulture. C'est vn grand œuure, & proprement de la main de Dieu, de conuertir vn pecheur & d'vn corbeau en faire vn pigeon, d'vn loup vne brebis, d'vn esclau de Sathan, son fils, & d'vn condamné aux flammes eternelles, l'heritier du Ciel. Et c'est vne chose si grande & merueilleuse qu'il est besoin de la toute-puissance de Dieu pour la faire, laquelle se monstre dauantage en cela, qu'en la creation du monde, & qu'en la belle & ad-

mirable fabrique de l'Vniuers: car le souuerain Operateur crea toutes les creatures par sa seule volonté, en disant: *Que la lumiere se fasse,* aussitost la lumiere fut faite sans aucune repugnance ny contradiction. Mais comme l'homme a son franc-arbitre, est maistre de soy, & de sa volonté, d'autre part Dieu veut conseruer ses dons, sans oster ceux qu'il nous a vne fois donnez, il trouue bien souuent de la resistance en l'homme, mesme es choses raisonnables, lors qu'il desire luy faire suiure le bon plaisir de sa sainte volonté. Or combien qu'en toutes les conuersions des pecheurs on voye reluire la puissance infinie, & la souueraine bonté de Dieu, qui pour ce regard se peuuent appeller miraculeuses: d'autant que les forces humaines, & de toute la nature, ne scauroient paruenir à conuertir vn pecheur, & d'iniuste le faire iuste, toutesfois il y a de certaines conuersions extraordinaires, esquelles on descouure beaucoup dauantage le puissant bras de nostre Seigneur, lesquelles sont admirables, & dignes de merueille, non seulement à cause du pouuoir avec lequel Dieu les fait, ains aussi à cause du moyen par lequel il les fait. Telle est la Conuersion de saint Paul, de laquelle saint Gregoire dit, qu'elle fut plus miraculeuse que la resurrection du Lazare, & comme telle nostre Mere sainte Eglise la celebre au iourd'huy avec grande Feste & solemnité. C'est chose merueilleuse que nostre Seigneur ayant conuertu tant & de si grands pecheurs à penitence, & tiré d'vn abyss de tenebres & meschanceté où ils estoient plongez, à la lumiere de sa cognoissance: & les ayant ornez de si grands merites de sainteté, l'Eglise ne celebre, ny solemnise le iour de la Conuersion d'aucun avec vne telle Feste, que celle seule de saint Paul, à cause que c'est chose si rare, si nouvelle, si admirable, & si vrile à toute l'Eglise.

Declarons maintenant la raison de ceste particularité que fait icy l'Eglise au iourd'huy. En premier lieu, il faut prendre garde, & considerer que l'Eglise militante & la triomphante sont deux sœurs, qui s'ayment d'vn estroit lien de charité, encore que l'vne habite au Ciel, & l'autre demeure icy en la terre: l'vne au port, l'autre en mer: la militante combat, & celle du Ciel triomphe: l'vne trauaille, l'autre repose: l'vne & l'autre s'aydent, ont leur correspondance & communication. La triomphante n'a aucune necessité pour soy, ains pour ses membres, qui rampent icy bas en terre, & sont bien souuent malades & oppressez. La militante est tousiours en bataille, & craignant d'estre vaincue, demande faueur & secours à sa bonne sœur, & tasche à l'imiter. Et d'autant qu'elle scait qu'au Ciel il se fait vne Feste solemnelle pour la Conuersion de saint Paul, elle desire l'ensuiure en cela, & ioindre sa ioye avec celle de sa sœur, & l'allegresse de la terre avec la iouissance celeste. Car estant vne verité infaillible, ce que nostre Seigneur Iesus-Christ dit en saint Luc, qu'il y a plus grande ioye au Ciel pour vn pecheur qui se conuertit & fait penitence, que pour quatre-vingts dix-neuf iustes qui n'en